

**შპს „პისი მაქსის“ მაგისტრალურ/ძირითად („trunk“) ქსელთან დაშვების შეთავაზების
წინადადება (მოწვევის ოფერტი)**

წინამდებარე „მაგისტრალურ/ძირითად („trunk“) ქსელთან დაშვების შეთავაზების წინადადებით“ (შემდგომში „მოწვევის ოფერტი“) განსაზღვრულია შპს „პისი მაქსის“ (შემდგომში „ოფერენტი“) მიერ მაგისტრალურ/ძირითად („trunk“) ქსელთან დაშვების შეთავაზების პირობები, რომელიც ვრცელდება მაგისტრალურ/ძირითად („trunk“) ქსელთან დაშვების მსურველი ყველა ავტორიზებული პირის მიმართ (შემდგომში „აქცეპტანტი“ ან „მეორე მხარე“).

ტექნიკური შესაძლებლობის და თავისუფალი რესურსის არსებობის შემთხვევაში ოფერენტი უზრუნველყოფს აქცეპტანტის დაშვებას მაგისტრალურ/ძირითად („trunk“) ქსელთან შემდეგი არსებითი პირობებით:

მუხლი 1. დაშვებასთან დაკავშირებული დათქმები, დაშვების წინაპირობები და პროცედურები

- 1.1. საქართველოს კომუნიკაციების ეროვნული კომისიის 2018 წლის 6 დეკემბრის N 671/9 გადაწყვეტილებით (და მასში 2019 წლის 18 აპრილის N235/19 და 2026 წლის 18 ივნისის N გ-26-19/281 გადაწყვეტილებების საფუძველზე შეტანილი ცვლილებებით) დადგენილ მიმართულებებზე/მარშრუტებზე შესაბამისი ტექნიკური შესაძლებლობის და თავისუფალი რესურსის არსებობის შემთხვევაში ოფერენტი უზრუნველყოფს მეორე მხარის მაგისტრალურ/ძირითად („trunk“) ქსელთან დაშვებას წინამდებარე მოწვევის ოფერტის შესაბამისად.
- 1.2. დაშვების პროცედურის ინიცირებისათვის აქცეპტანტმა ოფერენტს უნდა წარუდგინოს შემდეგი დოკუმენტები („აქცეპტის დოკუმენტაცია“):
 - 1.2.1. „ელექტრონული კომუნიკაციების შესახებ“ საქართველოს კანონის შესაბამისად აქცეპტანტის მიერ მოპოვებული ავტორიზაციის დამადასტურებელი დოკუმენტის ასლი;
 - 1.2.2. ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან აქცეპტანტის შესახებ;
 - 1.2.3. აქცეპტანტის უფლებამოსილი წარმომადგენლის პირადობის დამადასტურებელი დოკუმენტის ასლი;
 - 1.2.4. აქცეპტანტის უფლებამოსილი წარმომადგენლის უფლებამოსილების დამადასტურებელი დოკუმენტის ორიგინალი ან დამოწმებული ასლი, იმ შემთხვევაში

თუ აქცეპტანტს წარმოადგენს პირი, რომელიც არ არის მითითებული 1.2.2 პუნქტში მითითებულ ამონაწერში;

1.2.5. აქცეპტანტის უფლებამოსილი წარმომადგენლის მიერ ხელმოწერილი და შევსებული განაცხადი („განაცხადი“), რომელ განაცხადშიც აქცეპტანტმა უნდა მიუთითოს:

- (i) აქცეპტანტის სახელწოდება;
- (ii) აქცეპტანტის სამართლებრივი ფორმა;
- (iii) აქცეპტანტის იურიდიული და ფაქტობრივი მისამართი;
- (iv) აქცეპტანტის საიდენტიფიკაციო ნომერი;
- (v) აქცეპტანტის წარმომადგენლის სახელი/გვარი, პოზიცია;
- (vi) აქცეპტანტის მიერ მოთხოვნილი მაგისტრალურ/ძირითად („trunk“) ქსელთან დაშვების მომსახურების მახასიათებლები: მომსახურების დასახელება, მარშრუტი (საწყისი წერტილი, საბოლოო წერტილი), მოცულობა ან/და ოპტიკური ძარღვების რაოდენობა;
- (vii) აქცეპტანტის დასტური, რომ იგი სრულად გაეცნო, ეთანხმება და უპირობოდ შეასრულებს მოწვევის ოფერტის ყველა და ნებისმიერ პირობას.

1.3. აქცეპტანტმა აქცეპტის დოკუმენტაცია უნდა გააგზავნოს ფოსტით ოფერენტის რეგისტრირებულ მისამართზე ან/და ელექტრონული ფოსტით შემდეგ მისამართზე: info@pcmax.ge.

1.4. აქცეპტანტის მაგისტრალურ/ძირითად („trunk“) ქსელთან დაშვების აუცილებელი წინაპირობები არის შემდეგი:

1.4.1 ოფერენტს უნდა გააჩნდეს აქცეპტანტის მიერ მოთხოვნილ მიმართულებებზე/მარშრუტებზე მაგისტრალურ/ძირითად („trunk“) ქსელთან დაშვების ტექნიკური შესაძლებლობა და თავისუფალი რესურსი;

1.4.2 აქცეპტანტს არ უნდა ჰქონდეს ოფერენტის მიმართ შეუსრულებელი რაიმე სახის ფულადი ვალდებულება.

1.5. აქცეპტის დოკუმენტაციის წერილობით ან/და ელექტრონული ფოსტით მიღებიდან 10 (ათი) დღის ვადაში ოფერენტი შეისწავლის მათ შესაბამისობას ზემოთ მითითებულ მოთხოვნებთან.

- 1.6. იმ შემთხვევაში, თუ აქცეპტის დოკუმენტაცია არ აკმაყოფილებს წინამდებარე მუხლის მოთხოვნებს ან/და აქცეპტანტს გააჩნია შეუსრულებელი ფულადი ვალდებულებები ოფერენტის მიმართ, ან/და ოფერენტს არ გააჩნია განაცხადით მოთხოვნილი მომსახურების გასაწევად შესაბამისი ტექნიკური შესაძლებლობა ან/და თავისუფალი რესურსი, მაშინ ოფერენტი დაუბრუნებს აქცეპტანტს აქცეპტის დოკუმენტაციას და ჩაითვლება, რომ აქცეპტი არ გაკეთებულა, შესაბამისად, ოფერენტს არ წარმოეშობა ვალდებულება უზრუნველყოს აქცეპტანტის დაშვება მაგისტრალურ/ძირითად (“trunk”) ქსელთან.
- 1.7. იმ შემთხვევაში, თუ აქცეპტის დოკუმენტაცია აკმაყოფილებს წინამდებარე მუხლის მოთხოვნებს, აქცეპტანტს არ გააჩნია შეუსრულებელი ფულადი ვალდებულებები ოფერენტის მიმართ და ოფერენტს აქვს შესაბამისი ტექნიკური შესაძლებლობა და თავისუფალი რესურსი მომსახურების გასაწევად, მაშინ ოფერენტი აქცეპტის დოკუმენტაციის მიღებიდან არაუგვიანეს 4 (ოთხი) დღის ვადაში უგზავნის მეორე მხარეს მაგისტრალურ/ძირითად (“trunk”) ქსელთან დაშვების მომსახურების ხელშეკრულების („მომსახურების ხელშეკრულება“) სამ ეგზემპლარს, რომელთაგან თითოეული მოიცავს ოფერენტის უფლებამოსილი წარმომადგენლის ხელმოწერას. ასეთ შემთხვევაში აქცეპტანტი ვალდებულია 4 (ოთხი) დღის ვადაში დაუბრუნოს ოფერენტს აქცეპტანტის უფლებამოსილი წარმომადგენლის მიერ ხელმოწერილი მომსახურების ხელშეკრულების ორი ეგზემპლარი. დათქმულ ვადაში აქცეპტანტის მიერ მომსახურების ხელშეკრულების სათანადო ფორმით ოფერენტისთვის წარუდგენლობის შემთხვევაში ჩაითვლება, რომ აქცეპტანტი უარს ამბობს წინამდებარე მოწვევის ოფერტით ოფერენტის მიერ შეთავაზებულ მომსახურებაზე და, რომ აქცეპტანტსა და ოფერენტს შორის არ წარმოიშობა შესაბამისი სამართლებრივი ურთიერთობა.
- 1.8. მომსახურების ხელშეკრულება ძალაში შედის მხარეთა მიერ მისი ხელმოწერისთანავე და მოქმედებს 1 (ერთი) წლის ვადით.
- 1.9. მომსახურების ხელშეკრულების საფუძველზე ოფერენტის მიერ აქცეპტანტისათვის მომსახურების გაწევა დაიწყება აღნიშნული ხელშეკრულების ძალაში შესვლიდან 5 (ხუთი) სამუშაო დღის ვადაში, თუ კლიენტის მიერ არ არის მოთხოვნილი აღნიშნულ ვადისგან განსხვავებული ვადა, იმ პირობით, რომ მოცემულ ვადაში აქცეპტანტი დააკმაყოფილებს მომსახურების ხელშეკრულებით განსაზღვრულ ტექნიკურ მოთხოვნებს.
- 1.10. მომსახურების ხელშეკრულების მოქმედების განმავლობაში ნებისმიერ დროს, იმ პირობით, რომ მოცემული მომენტისათვის აქცეპტანტს შესრულებული აქვს ოფერენტის მიმართ ყველა ფულადი ვალდებულება, აქცეპტანტი უფლებამოსილია მოითხოვოს მომსახურებისთვის დამატებითი რესურსის გამოყოფა. ასეთი წერილობითი მოთხოვნის მიღების შემდეგ, იმ შემთხვევაში თუ ოფერენტს აქვს შესაბამისი ტექნიკური შესაძლებლობა

და თავისუფალი რესურსი, ოფერენტი და აქცეპტანტი გააფორმებენ შესაბამის ცვლილებას მომსახურების ხელშეკრულებაში. აქცეპტანტის მოთხოვნის გაგზავნა, განხილვა და დადასტურება, ხოლო შემდგომ ოფერენტის მიერ აქცეპტანტისათვის ცვლილებების პროექტის გაგზავნა და გაფორმება ხდება ამ მუხლით განსაზღვრული პირობებისა და ვადების ანალოგიურად.

1.11. მომსახურების ხელშეკრულების მოქმედება შეიძლება შეწყდეს შემდეგი საფუძვლებით:

1.11.1. მხარეთა შეთანხმება;

1.11.2. მოქმედების ვადის გასვლა;

1.11.3. ერთ-ერთი მხარის მიერ მოწვევის ოფერტის ან მომსახურების ხელშეკრულების პირობების სისტემატური დარღვევა ან არაჯეროვანი შესრულება, თუ ამგვარი დარღვევა არ აღმოიფხვრა დამრღვევი მხარის მიერ მეორე მხარისაგან წერილობითი შეტყობინებიდან 10 (ათი) სამუშაო დღის განმავლობაში;

1.11.4. ერთ-ერთი მხარის ლიკვიდაცია;

1.11.5. ერთ-ერთი მხარის მიმართ გადახდისუუნარობის საქმის წარმოების დაწყება;

1.11.6. საქართველოს კანონმდებლობით დადგენილი სხვა საფუძვლები.

მუხლი 2. მომსახურების ტექნიკური საკითხები

2.1. მომსახურების მისაღებად აქცეპტანტი ვალდებულია საკუთარი ძალისხმევითა, სახსრებით და რისკით უზრუნველყოს მიერთება განაცხადში მითითებულ შესაბამისი მონაკვეთის დაშვების წერტილზე.

2.2. დაშვების პროცედურების დასრულების შემდეგ 2 (ორი) სამუშაო დღის განმავლობაში მხარეებმა უნდა განხორციელონ აქცეპტანტისთვის გამოყოფილი რესურსების ფიზიკური პარამეტრების ტესტირება, რომელიც გულისხმობს რესურსების მახასიათებლების მოთხოვნილ პარამეტრებთან შესაბამისობის დადგენას („ტესტირება“). ტესტირებას უნდა ესწრებოდნენ ორივე მხარის წარმომადგენლები. ტესტირების დასრულების შემდეგ მხარეებმა უნდა გააფორმონ შესაბამისი მიღება-ჩაბარების აქტი, სადაც ასახავენ ტესტირების შედეგებს.

2.3. ოფერენტი უზრუნველყოფს აქცეპტანტისთვის მომსახურების გაწევას შემდეგი პარამეტრებით:

ა) ჯიტერი (მილიწამი)	<[30]
ბ) დაყოვნება (მილიწამი)	<[50]
გ) დაკარგული პაკეტების კოეფიციენტი (%)	<[0,3]

მუხლი 3. ტექნიკური და გეგმიური სამუშაოების ჩატარების პირობები

- 3.1. თუ აქცეპტანტი თვლის, რომ ადგილი აქვს ავარიას, შეფერხებას ან რაიმე სახის დაზიანებას, რამაც გამოიწვია აქცეპტანტის მიერ მაგისტრალური/ძირითადი (“trunk”) ქსელით სარგებლობის შეწყვეტა ან შეფერხება („დაზიანება“), დაზიანების დაფიქსირების მიზნით აქცეპტანტი ვალდებულია აღნიშნულის თაობაზე შეატყობინოს ოფერენტს. შეტყობინებაში მითითებული უნდა იყოს დაზიანების სავარაუდო ლოკაცია და იგი უნდა გაიგზავნოს შემდეგ მისამართზე: support@pcmax.ge.
- 3.2. ოფერენტი ვალდებულია გამოყოს შესაბამისი პერსონალი/სამუშაო ჯგუფი, რომელიც მზად იქნება ნებისმიერ დროს (24/7/365) მიიღოს შეტყობინება, შეძლოს მასზე დაუყოვნებლივი რეაგირება და შესაბამისი ღონისძიებების გატარება დაზიანების რეგისტრაციის, კვალიფიკაციის, პრიორიტეტიზაციისა და აღმოფხვრის მიზნით.
- 3.3. მაგისტრალურ/ძირითად (“trunk”) ქსელში წარმოქმნილი დაზიანების დაფიქსირება, რეგისტრაცია, კვალიფიკაცია და პრიორიტეტიზაცია ხორციელდება ინციდენტის სირთულის მიხედვით, შემდეგ კატეგორიებად:
 - 3.3.1. კრიტიკული ხარვეზი: მომსახურების სრული შეწყვეტა. ასეთი ტიპის დაზიანება უნდა აღმოფხვრას აქცეპტანტის შეტყობინების მიღებიდან მაქსიმუმ [8 (რვა)] საათში;
 - 3.3.2. მნიშვნელოვანი ხარვეზი: მომსახურების ხარისხის მკვეთრი გაუარესება ან დეგრადაცია. ასეთი ტიპის დაზიანება უნდა აღმოფხვრას აქცეპტანტის შეტყობინების მიღებიდან მაქსიმუმ [24 (ოცდაოთხი)] საათში;
 - 3.3.3. ნაკლებად მნიშვნელოვანი ხარვეზი: არაკრიტიკული/ლოკალური ხასიათის შეფერხება. ასეთი ტიპის დაზიანება უნდა აღმოფხვრას აქცეპტანტის შეტყობინების მიღებიდან მაქსიმუმ [48 (ორმოცდარვა)] საათში.
- 3.4. ოფერენტმა გეგმიური სარემონტო სამუშაოების ჩატარების შესახებ უნდა შეატყობინოს აქცეპტანტს სულ მცირე 8 (რვა) კალენდარული დღით ადრე. შეტყობინებაში უნდა მითითდეს გეგმიური სამუშაოების დაწყების ზუსტი დრო, სავარაუდო ხანგრძლივობა, მითითება ქსელის იმ ნაწილზე, რომლითაც აქცეპტანტი ვერ ისარგებლებს გეგმიური სარემონტო სამუშაოების მიმდინარეობის დროს. გეგმიური სარემონტო სამუშაოს ხანგრძლივობა არ უნდა

აღმატებოდეს ერთ ჯერზე 6 (ექვსი) საათს, ხოლო კვარტალში ჯამრი 18 (თვრამეტი) საათს. ასეთი სამუშაოები უნდა ჩატარდეს 00:00-08:00 საათების ინტერვალში, გარდა იმ შემთხვევისა თუ მხარეები სხვა რამეზე შეთანხმდებიან.

- 3.5. აქცეპტანტი აცნობიერებს, რომ გეგმიური ან დაზიანების აღმოსაფხვრელად მიმდინარე სამუშაოების დროს, შეიძლება დროებით შეიზღუდოს ან შეწყდეს შესაბამისი მაგისტრალური/ძირითადი (“trunk”) ქსელით სარგებლობა, რაც არ წარმოადგენს ხარისხობრივი მაჩვენებლის ან მომსახურების ხელშეკრულების სხვა პირობების დარღვევას. ხარისხობრივი მაჩვენებელი დარღვევულად ჩაითვლება მხოლოდ იმ შემთხვევაში, თუ ოფერენტი გეგმიურ სარემონტო სამუშაოებს ახორციელებს წინამდებარე 3.5 პუნქტით დადგენილი რომელიმე ვადის დარღვევით.
- 3.6. გეგმიური სარემონტო სამუშაოების საპატიო ხანგრძლივობა ინდივიდუალურად აითვლდება მხარეთა შორის გაფორმებული ხელშეკრულებით განსაზღვრული ყოველი მიმართულების ღირებულების მიმართებაში.
- 3.7. დაზიანებისა და გეგმიური სარემონტო სამუშაოების აღმოფხვრისათვის დადგენილი საპატიო მოცდენის დროის ათვლა მოხდება ერთმანეთისგან დამოუკიდებლად.

მუხლი 4. ექსტრაორდინარულ, ფორსმაჟორულ შემთხვევებთან დაკავშირებული პირობები და მხარეთა ურთიერთვალდებულებები

- 4.1. მხარეთა პასუხისმგებლობა არ დგება დაუძლეველი ძალის მოქმედების შემთხვევაში. მხარეები თავისუფლდებიან პასუხისმგებლობისაგან ვალდებულებების სრული და ნაწილობრივი შეუსრულებლობისათვის დაუძლეველი ძალის მოქმედების შემთხვევაში, რომლის დროსაც შეუძლებელია მოწვევის ოფერტი და მომსახურების ხელშეკრულებით გათვალისწინებული ვალდებულებების შესრულება.
- 4.2. „დაუძლეველი ძალის“ ქვეშ იგულისხმება გარემოებები, რომლებიც არ არსებობდნენ მომსახურების ხელშეკრულების გაფორმების დროს და რომელთა დადგომა და ზემოქმედება მხარეებს არ შეეძლოთ წინასწარ განეჭვრიტათ, ან თავიდან აეცილებინათ. ამგვარი გარემოებები შემოფარგლულია წყალდიდობით, ხანძრით, მიწისძვრით და სხვა სტიქიური მოვლენებით, აგრეთვე ომით, სამხედრო ოპერაციებით, გაფიცვებით, ამბოხებებით, ხელისუფლების მიერ მიღებული დადგენილებებით ან განხორციელებული ქმედებებით ან მსგავსი ხასიათის სხვა გარემოებებით ან ქმედებებით. თუ ნებისმიერმა ზემოთნახსენებმა გარემოებამ უშუალოდ იმოქმედა მხარეთა მიერ ნაკისრი ვალდებულებების შესრულების ვადებზე, მაშინ ეს ვადები ამ გარემოებების მოქმედების დროის თანაბარზომიერად გაიზრდება.

- 4.3. მხარე, რომლისთვისაც ფორს-მაჟორული გარემოებების დადგომის გამო შეუძლებელი შეიქმნა ვალდებულებების შესრულება, ვალდებულია დაუყოვნებლივ, მაგრამ არაუგვიანეს 5 (ხუთი) დღისა ამ გარემოებების დადგომიდან და დასრულებიდან, აცნობოს მეორე მხარეს.
- 4.4. შეუტყობინებლობისა და დაგვიანებული შეტყობინების შემთხვევაში შესაბამისი მხარე კარგავს უფლებას დაეყრდნოს ფორს-მაჟორული გარემოებების არსებობას, როგორც პასუხისმგებლობისგან გათავისუფლების საფუძველს. მხარე ვალდებულია დაადასტუროს შეტყობინებაში მითითებული ფაქტები.
- 4.5. თუ დაუძლეველი ძალის მოქმედება გრძელდება 15 (თხუთმეტი) დღეზე მეტხანს, მხარეებმა უნდა გადაწყვიტონ მომსახურების ხელშეკრულების მოქმედების შეწყვეტის საკითხი.

მუხლი 5. ანგარიშსწორების პირობები

- 5.1. აქცეპტანტისათვის ოფერენტის მიერ გაწეული მომსახურების საფასური („მომსახურების საფასური“) გამოიანგარიშება N1 დანართში მითითებული ტარიფების შესაბამისად.
- 5.2. ოფერენტი უფლებამოსილია ცალმხრივად შეცვალოს მოწვევის ოფერტით განსაზღვრული ტარიფები რა შემთხვევაშიც, ოფერენტი ვალდებულია 30 (ოცდაათი) კალენდარული დღით ადრე აცნობოს მეორე მხარეს ტარიფების ცვლილების შესახებ და შეცვალოს მომსახურების ხელშეკრულებით გათვალისწინებული ტარიფები.
- 5.3. მხარეებს შორის ანგარიშსწორება წარმოებს ყოველთვიურად წინასწარი გადახდის წესით უნაღდო ანგარიშსწორების გზით. ანგარიშსწორება მხარეთა შორის ხორციელდება ყოველი საანგარიშო პერიოდის, კალენდარული თვის 14 (თოთხმეტი) რიცხვამდე, ოფერენტის მიერ მეორე მხარისთვის წარდგენილი ინვოისის საფუძველზე სრული მოცულობით.
- 5.4. ანგარიშსწორების ვადის დარღვევის შემთხვევაში ოფერენტი უფლებამოსილია ვალდებულების დარღვევის დღიდან დაარიცხოს აქცეპტანტს, ხოლო აქცეპტანტი ვალდებულია გადაუხადოს ოფერენტს პირგასამტეხლო, გადასახდელი თანხის 0.1%-ის ოდენობით ყოველ ვადაგადაცილებულ დღეზე. ორაზროვნებისა და გაუგებრობის თავიდან აცილების მიზნით მხარეები თანხმდებიან, რომ გადახდილი თანხები პირველ რიგში მოხმარდება დარიცხული პირგასამტეხლოს ოდენობის დაფარვას და მეორე რიგში - ძირითადი დავალიანების დაფარვას.

მუხლი 6. მოწვევის ოფერტის მოქმედების ვადა

- 6.1. წინამდებარე მოწვევის ოფერტა ძალაში შედის საქართველოს კომუნიკაციების ეროვნული კომისიის ოფიციალურ ვებ-გვერდზე გამოქვეყნების მომენტიდან და მოქმედებს 3 (სამი) წლის ვადით.

მუხლი 7. დასკვნითი დებულებები

- 7.1. მხარეთა შორის შეტყობინება განხორციელებულად მიიჩნევა მისი წერილობითი ფორმით შესრულებისა და უფლებამოსილი პირის დამოწმების შემთხვევაში. შეტყობინება მხარეებს უნდა მიეწოდოთ კურიერული ფოსტის, დაზღვეული წერილის, ან ელექტრონული ფოსტის მეშვეობით მომსახურების ხელშეკრულებაში მითითებულ მისამართებზე. მხარე ვალდებულია 5 (ხუთი) სამუშაო დღის ვადაში აცნობოს მეორე მხარეს საკონტაქტო მონაცემების ცვლილების შესახებ.
- 7.2. ერთ-ერთი მხარის მიერ მოწვევის ოფერტით ან მომსახურების ხელშეკრულებით გათვალისწინებული რომელიმე უფლების გამოუყენებლობა არ წარმოადგენს ასეთი უფლების უარყოფას ან ასეთ უფლებაზე საბოლოოდ უარის თქმას.
- 7.3. ოფერენტსა და მეორე მხარეს შორის წარმოშობილი ნებისმიერი დავა და უთანხმოება წყდება მოლაპარაკების გზით. შეთანხმების მიუღწევლობის შემთხვევაში მხარეებს შორის დავა წყდება მოქმედი კანონმდებლობის შესაბამისად.

დანართი N1

შპს „პისი მაქსის“ მაგისტრალურ/ძირითად (“trunk”) ქსელთან დაშვების ტარიფები

მომსახურების სახე	განზომილებები	ყოველთვიური საფასური ლარში, დღგ-ს გარეშე
ოპტიკურ-ბოჭკოვან კაბელში ოპტიკური ძარღვის სარგებლობის უფლებით გადაცემა	მანძილი: 1(ერთი) კილომეტრი ოპტიკური ძარღვების რაოდენობა: 1 (ერთი) ძარღვი	14.9
მონაცემთა ტრანსპორტირება	1 (ერთი) მეგაბიტ/წმ	0.50